



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

Sweden ato kilonser menden nungi aluogo

Golaghat Police-i drug mafia Pappu Ali puogo



VOL. XVIII NO. 255 (ADOK 255) DIMAPUR

SANGTENNÜ (TUESDAY)

AAMI (JUNE) 29, 2021

₹ 5.00

Nagaland Governor-i NLA session ayonger

Dimapur, June 28, 2021 (TYO): August 3, 2021 nungi 13 buba Nagaland Legislative Assembly indang session tibuba tenzüksü.

NLA session ji Assembly Hall, Kohima nung anepdang 9:30 ako nungi tenzüksü, ta Nagaland Governor-i tanü metetdaksü.

COVID-19 Nagaland: Nisung 25,000 adenogo

Kohima, June 28, 2021 (TYO): Hombarnü nisung 56 dak COVID-19 aliba putetba züngsema Nagaland nung COVID-19 puteter 25,000 adenogo.

Hombarnü COVID-19 puteta alir nisung 6 asü. Parnokji Dimapur o Mokokchung nung anana aser Kohima o Peren nung kaka liasü. Tanü asürtem züngsema nisung ajak agi 493 kumogo saka parnok 14 bo tanga tashidak ajanga asü, ta Dr Kikon-i metetdaksü.

"Tanü nisung 56 dak COVID-19 putet. Parnok ya Kohima nung 25, Dimapur nung 17, Mokokchung nung 7, Peren nung 6 aser Kiphire nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Deobar tashi nung nisung 4,13,838 nem COVID-19 vaccine indang dose 4,71,054 agütsüogo, ta State Immunization Officer, Dr Ritu Thurr-ia ashi.

"Maneni, tanü COVID-19 puteta alir nisung 175 taneptsü angu. Parnok ya Dimapur nung 72, Kohima nung 54, Mokokchung nung 23, Peren nung 12, Zunheboto nung 6, Mon nung 5, Tuensang nung 2 aser Wokha nung 1 lir" ta paisa ashi.

Vaccine agirtemji frontline workers 60,076, healthcare workers 15,791, arishi kum 45 ser temapur 1,47,112 aser arishi kum 18 nung 44 tsüngda alir 1,90,838 lir, ta pai ashi.

Nagaland nung nisung 25,017 dak COVID-19 putetba nungi 22,426 taneptsü nguogo aser tang nisung 1,397 anepaludar. COVID-19 nungi taneptsü angurji 89.64% lir.

"Vaccine agirtem rongnungi nisung 57,216-i dose anaprong agiogo. Parnokji frontline workers 28,716, healthcare workers 10,427, arishi kum 45 ser temapur 18,063 aser arishi kum 18 nungi 44 tsüngda alir 10 lir" ta Dr Thurr-isa metetdaksü.

Minister Metsubo-i RD Dept. ketdangsürtem ayongzük

Kohima, June 28, 2021 (TYO): Department ketdangsürtemi Covid wara indang tatemtsü amer mekazütsüla saka VDBs nem tetuyuba agüja mapa ajak inyaksüla, ta Rural Development, Metsubo Jamir-i tanü metetdaksü.

Ministry-i yimtsüng shia nungi Actual Resident Data meshir, anungji census nung ajemdaker yim shia nung 60% vaccination atongtsü atema ketdangsür ajaki census shitak agütsütü ayongzük" Minister ta Metsubo-isa ashi.

"Alima melenshiogo aser asenoka alima den külemi memelenshira, asen teinyaksüttem toktsütsüla" ta pai ashi.

"Department-i mapang shia online ajanga ibala mesükba sendentem ayonga amentsü anungji ketdangsür ajaki osang tejangja metetpelar lemsateptsü atema renema alitsüla" ta Commissioner & Secretary, RD, Nepso Theluo-ia ashi.

June 28, 2021 nü online ajanga Project Directors aser Block Development Officers den jembidang Minister Metsubo-i iba olen lemsatap.

Joint Director, K. Neibou Sekhose-ia district ajak dang July 20 tashi nung success stories 15 agütsütsü nenshia metetdaksü.

"Rural Development Department ya NEFMS (National Electronic Financial Monitoring System) nung register süogo aser iba ajanga Union ministry-i job cards jangjashir. Anungji BDO temi kuli tejangja maliba job cards amshiba anentsüla" ta paisa metetdaksü.

"MoPR-i tuyuba ama yimtsüng ajaki Citizens Charter renemtsüla" ta paisa ashi.

Department nung ketdangsür ajaki mapang shitak nung reports aser returns agütsütsüla aser MIS system nunga osang tejangja sayutsüla. Union

Senden nung MD, NSRLM, Imtimenla-i NSRLM, Joint director Neizovonuo Neikha-i MGNREGA aser RDO, Hamdok Konyak-i PMAY-G indang osang tatsütsü lemsatap.

Senden nung mendenji Director, RD, Liboni Humtsoe liasü aser Addl. director, Azenuo Pienu-i anküp tepela o jembi.

July 1 nungi Nagaland nung 'Unlock-1' tenzüksü

Kohima, June 28, 2021 (TYO): July 1, 2021 nungi Nagaland nung ita ka ser teshadang tashi COVID-19 anema lockdown aliba lapokyonga aotsü ta Hombarnü Minister Neiba Kronu-i ashi.

Tang daily positivity rate 8.26% aser overall positivity rate 12.8% kumogo, ta Health & Family Welfare Department Deputy Director, Dr Nyanthung Kikon-i ashi.

nungi anepdang 5:00 ako tashi nisung aser gari senzüksü memelar saka July 1 nungi aonung 7:00 ako nungi anepdang 4:00 tashi noktangtsü lemtetogo. Ajisüaka, DTF temi pei pei district nung tensa dak rangloker telemtetba agütsü, ta Minister Kronu-isa metetdaksü.

"High Powered Committee (HPC) on COVID-19 ajanga July 1 nungi 10 tashi Unlock-1 asütsü lemtetogo" ta pai metetdaksü.

May 17 nü Covid-19 puteta alir taneptsü anguba 71.98% aliba nungi Deobar tashi nung 89.14% kumogo.

Tekülem kitem, kiyimba aser asüpila sentongtem nung nisung 50 tashi adenshütsü melar. Külen sorkar office tem 50% attendance lia lapoktsü, ta paisa ashi.

June 26 nü COVID-19 War Room nung Chief Secretary J Alam-i anir ketdangsüremi District Task Force (DTF) tem den senden amenba sülen tanü Chief Minister Neiphiu Rio-i anir HPC on COVID-19 senden nung iba telemtetba agi, ta Minister Kronu-isa ashi.

"Nagaland nung lockdown asütsü nungdak madoker saka COVID-19 inyakyim sülen anidaktsüla. COVID-19 tendangba aser vaccine agütsüba maparen tuluba inyakttsü" ta Minister Kronu-isa ashi.

"Nagaland nung shisaliok rejutem maneni shibangtsü aser Dimapur railway station nung train manendaksütsü" ta Principal Secretary Abhijit Sinha-ia ashi.

Nagaland nung May 14, 2021 nungi total lockdown tenzükä liasü aser iba sülen pezüben tashi mapang atsülangogo.

July 1 nungi tenzükur anogo 10 nü talenba salaba mapang tensa jungjunga asadangtsü, ta paisa ashi.

"Home Department ajanga 'Unlock-1' atema Standard Operating Procedures (SOPs) metetdaksütsü aser DTF temi pei pei sasep nung telemtetba agütsü tashi agütsür" ta Sinha-isa ashi.

May 14 nü COVID-19 daily positivity rate 24.66% aser overall positivity rate 10.23%

HPC-i shishilembadak aser süoshi ayokba dokantem dena tanga dokantem anogo lemsar lapoktsü atema telemtetba agiogo, ta paisa shisem.

Tang nikongdang 4:00 ako

Dimapur nung COVID-19 tensa tajungba kumogo

Nija mozü kitem nung Covid-19 agi shirangertem manepalutsü

Dimapur, June 28, 2021 (TYO): Nagaland kübok Dimapur district nung nisung teimtiba dak Covid-19 putetba den nisung 280 tashi iba tashidak ajanga asü, saka tangbo kanga ajemogo.

Agriculture Production Commissioner aser Team Dimapur atema Nodal Officer, Y Kikheto Sema-i ashi.

temi kanga nendaka inyakba ajanga Covid tensa azüoktetogo ta ashi.

Dimapur district nung Covid agi shirangertem aser positivity rate ajema akümba ajanga tang atema nija mozü ki ajak non-Covid hospitals akümtsü telemtetba agiogo.

"Nisung ajaki SOPs sülen anidaktsü aser menungnangi vaccine agütsü mepishir" ta paisa ashi.

"District tenung nung State Nodal officer nem tenütsang agütsür aser pa lenisüba kübok mapa tajung inyaktetogo. Covid mesüra non-Covid tensa ajak nung asenok külemi telok ka ama inyaka aotsü" ta paisa ashi.

Dimapur nung aliba nija mozü kitem nung tang nungi Covid agi shiranger nisung tasen maniokba dak alaka tang Covid agi shiranga anepalurtembo maneni yaritsü, ta tanü telemtetba agi.

Kikheto ya Dimapur nung Covid-19 maparen ketdangsüa reprangtsü atema sorkari mapa lezmükja liasü aser asung pa Agriculture Production Commissioner (APC) mapa inyakttsü atema Kohima-i atutsü.

"Dimapur ya mini city ka lir aser asenok telok ka ama longjemer inyakra mapa ajak nung takok ngua inyakttsü" ta Rothihu-isa metetdaksü.

Hombarnü Hotel Saramati Dimapur nung Private Doctors Association (PDA) Dimapur den State Nodal Officer Y. Kikheto Sema IAS aser Team Dimapur külem senden amendang iba telemtetba agia liasü.

Chief minister Neiphiu Rio aser Chief Secretary J Alam nati pa nem Dimapur nung mapa inyakttsü lezmüktsüba atema pelaba metetdaksü. Kikheto-isa frontline workers, private doctors association, arogotem, NGOs, civil societies aser kijatem dang pelaba ashi.

CMO Dimapur-ia o jembidang PDA aser mozü kitem dang pelaba metetdaksü.

Dimapur nung nütsung yongsük 50% den teimba nem vaccine agütsüogo. Nisung lakh 1.25 shi kati dose mezüngbuba aser nisung lakh 1.41 shi kati dose anaprong agiogo.

Senden nung Dimapur Deputy Commissioner Rajesh Soundararajan aser Commissioner of Police Rothihu Tetseo naprongi Nodal Officer dang pelaba ashi.

"Sorkari dang mozü aser tranga nungdakbatem agütsüra, nija mozü kitemi sorkar den yaritepa taa magii vaccine agütsütsü molunga lir. Covid agi shiranger anepaluba doctor tem balaka alitsü atema tesem nungdaker" ta Private Doctors Association President, Dr Victoria ashi.

"Dimapur nung positivity rate ajema kümra state ajunga lendong nungi kumzükur. Covid-19 ajema akümba ajanga joko District Hospital Dimapur aser Christian Institute of Health Sciences & Research dak alaka nija mozü kitem nung Covid-19 agi shirangertem manioktsü" ta

State Nodal officer-i mozü ki shia semdangba atema pelar. Telok ka ama asenok külemi lokti asoshi inyaka aotsü" ta DC Rajesh-i ashi.

"CISHR nung staff aser talisa nurse temi Covid agi shirangertem tajungba anepalutsü renema lir. Maneni, Covid wara tasembuba anema raratsü atema oxygen indang bottling plants talila nungdaksü" ta CISHR nungi Dr Clement-ia ashi.

Tanü amenba senden nung Eden, CISHR, Faith, Zion, Nagaland Multi Speciality aser tanga mozü kitem nungia doctor tem aden.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Tang tashi state ajaklen covid tashidak wara anema nisung nungtepa mesenzütsü asoshi mokdangba sentong liaka tesem aika nung nübortemi shitak mamshitetter. Tanü tentonü SBI Dimapur main branch nung nisungtem nungtepa noksa nung angur. July ita nungi mokdangba sentong ya terabo salatsü saka teni tebang sü agi nembangba aser nisungtem menungtepi tetsüngda yur inyaksangshiba tazüokbatembo maneni alitsü. Dimapur, June 28, 2021

COVID-19 agi tanur dak kongshiba webinar ka agi

Dimapur, Aami/June 28 (TYO): State Resources Centre for Women (SRCW) aser Beti Bachao Beti Padhao kübok Child Protection Services, Department of Social Welfare lungjemer June 28, 2021 nikongdang 2:00 ako nungi "Impact of COVID-19 on Children" indang webinar ka ayongzüka liasü. Iba sentong nung okila o jembiba mapang, State Resource Centre for Women aser Child Protection Services, Department of Social Welfare lungjemer Beti Bachao Beti Padhao kübok iba ama tongtipang sentong ayongzüka atema pelar, ta Sarah R. Ritse, Commissioner and Secretary to the Government of Nagaland, Department of Social Welfare ajanga ashi. Iba sentong ya ajanga state nung Child Protection Services, Child Welfare Committee, District Child Protection units, child care institutions, Childline, District Level Centres for Women, Mahila Shakti Kendra aser SRCW nung inyaktertem

lungjemdaksür, ta lai ashi. Tanü tanurtem dang kari 'COVID generation' ta ajar aser parnok ya tang tensa agi temang lendongbang nung yutsüba kisüing masü saka parnok shisaliok, tekolok shisatsü, temang ainba aser renlokba ajak nung kongshir. Tashidak wara yagi tanurtem kar mesüra timba takum tepiyong timtema ajurutsü akok, ta Sarah Ritse-i ashi. Tanurtem lenmang balala nung yaritsü atema state aser district level nung JJB, CWC, SJPU, SCPS, SARA, DCPU, CCIs, Childline, OSC aser Women Helpline lir, anungji asen tanurtem lendong balala nungi kumzüka ayuba maparen nung lokti tentet balalai item maongka amshitsü ayongzüker, ta lai ashi. Tosheli Zhimomi, Director, Child Protection Services ajanga sentong nung jembiba mapang, alima tesem ajungalen COVID-19 tashidak prokshiba aser lockdown benokba ajanga nisung ajak dang kongshia lir aser iba tashidak wara ya ano

matem aser wave tasembuba lir, ta scientist temi shizüka lir, ta ashi. Lockdown mechi school tem shibanga online yimya nung shisaliok sayuba ajanga tanur million aika timtem balala ajuru, kechiaser tanu ajakbo digital platform aser internet ya mali, ta lai ashi. Tanur aika COVID-19 agi masü saka lockdown mechi medical care, healthcare facility aser chiyongsü monguteti asür. Linük aser state nung COVID-19 agi nisung jenti asüba ama tanur aika tsürabur mali mesüra mabensa kumdaksür, anungji aikati tanurtem mapa tasak-taret inyadaksür, tanur asüdüng kibong kumdaksür, ozüing alema tanurtem adopt asür, ta ashi. Iba sentong nung Dr. Apong Longchar, Child Specialist, Nikos Hospital Dimapur ya shisalen sayur liasü. Iba webinar nung Mahila Shakti Kendra (MSK), Child Protection Services (DCPO, CWC, Childline 1098, CCI) amala nungi dena liasü.

Ghonda 48 atema SBI Changtongya Branch shibangtsür

Dimapur, Aami/June 28 (TYO): COVID-19 tashidak wara putetba aser nüburtem anema lidaktsütsü mechi Changtongya Town nung Church Ward kübok State Bank of India, Changtongya

Branch ya June 29, 2021 nü nungi tenzüka ghonda 48 atema shibangtsür, ta Rorheu Peseyie, NCS, SDO (Civil) ajanga sangdong ka nung metetdaksü. Iba tenokdangba nung

aibelenba nisung kar danga lira, Disaster Management Act, 2005 indang Section 51-60 aser IPC indang Section 188 kübok mela aliba ama tapet temerenshi agütsütsü, ta sangdong ajangasa ashi.



Aliba yim kübok mesemteter aliba Satier Sector nung alirtemi NH 702D (Mariani) lenmang nung khu abenba gari anishir (truck driver) aser ano ainlen jartem timtemba ngua angati chiyungtsü agütsüba mapang tangokba noksa nung angur. Truck driver-tem ya frontline nung noktaktertem lir aser parnok ajanga anogoshi district nüburtem asoshi chiyungtsü belener, saka tang ya lenmang nung hotel aser doka-tem melapokba ajanga parnoki meshitetba timtem aika ajuruba ngua parnok dang tepela sayua iba mapa ya inyaktsü, ta Satier nung alir kati iba osangbener den jembidang ashi. Mokokchung, June 28, 2021

Mokokchung nung population fortnight alitsü

Dimapur, Aami/June 28 (TYO): Taküm "Provisions of family planning services even in crisis, for a self reliant nation and family" omen nung ajemdaker World Population Day 2021 nungtem nung Department of Health and Family Welfare, Mokokchung ajanga June 27, 2021 nungi July 24, 2021 tashi population fortnight ayongzüksü, ta sangdong ka ajanga ashi. CMO Office, Mokokchung ajanga ashiba agi, iba mapang tubectomy aser IUCD inoktsüba amala service tem

angati alitsü. Tubectomy ya District Hospital Mokokchung nung agitsü aser IUCD inoktsüba maparen ya PHC aser CHC tem nung agitsü. Item service agitsü jangra alirtemi parnok tenungtem ASHAs nem agütsütsüla mesüra June 27 nungi July 10, 2021 tashi mobilization fortnight aliba mapang anasatiba Health centre semdangtsü akok. Iba fortnight mapang ASHA temi oral contraceptive pills aser condom lema agütsütsü.



Imkonglenden Colony, Dimapur nung June 28, 2021 nü health ketdangsür kati nisung ka nem COVID-19 mozü agitsüba mapang tangokba noksa nung angur. Hombarnü Imkonglenden aser temeket nung aliba colony nungi nisung 282 nem COVID-19 mozü agüja liasü.

Tashiyim mapa inyaker nem tapet temerenshi agüjang: NMA

Dimapur, Aami/June 28 (TYO): Mon district kübok Aboi nung June 20, 2021 nü tetsürchanu ana mita atar ka jena otet aser ka dak nisung teloki tashiyim amshia shi nung medemba asoshi süoki ia agidaktsüner, ta Naga Mothers' Association (NMA) ajanga Deputy Chief Minister, Nagaland dangi takhangba shidi ka zülua liasü. Ozüing amshirtemi iba maparen nung tai tonglokja alirtem apuba atema tenügdang agütsür, saka tang state nung COVID-19 tashidak wara den raraba mapang tetsürchanu aser tetsürtem anema mapa tamajung inyakba tali akumba ngua temolung korema jashir, ta Naga

Mothers' Association ajanga shidi nung shia lir. State sorkai ken o süoki ia agizüka memenui obendang shidak agütsütsü ajungshir, ta parnoki ashi. NMA ajanga takhangba shidi nung, ozüing agi melaba ama tashiyim mapa inyaker nem tapet temerenshi agütsütsüla, bail nung mechioktsüla, ken o tekeratiba nung bentetretetsüla, timtem ajurua alir nem teyari agütsütsüla aser counselling agüja yariteptsüla, ta shia liasü. Mapang shidak nung iba ama timtem ajura alir nem obendang shidak agütsüba ajanga nüburtemi temzüng-ozüing nung tamang akatsü ajungmesotsü, ta NMA ajangasa ashi.

Sakshi Circle nung tapi agi COVID-19 sample bendena jaja

Dimapur, Aami/June 28 (TYO): Longleng District Task Force on COVID-19 ajanga EAC Sakshi Circle kübok aliba yimtsüing ajunga nung June 27, 2021 nü tapi agi COVID-19 sample bendena jaja liasü. Yimdak yimtsüingtem nung COVID-19 tashidak putetba asadangtsü nükjidong nung iba sentong ya Deputy Commissioner, Longleng, M Shayung Phom, NCS; Sr. Superintendent of Police,

Longleng, Yanithung Ezung, NPS; Additional Deputy Commissioner Longleng, D. Robin, NCS aser SDO Civil Longleng Trongdiba Tongpi T. Sangram, NCS nungertemi anir telok pezü lemsar agia liasü. Iba COVID-19 sample tapi agi bendenba maparen nung District Administration, Police, VG aser Medical Department ajanga tongti shilem agi, kong parnoki sample 174 tashi tendanga liasü.



Assam Chief Minister Dr Himanta Biswa Sarma-i state nung gari lendong atalokba ajemdaktsüsu atema mapa inyaktsü tetuyuba agütsüba sülen Hombarnü Assam transport department-i Guwahati nung 'No helmet, no petrol' policy tenzükogo. (Guwahati, June 28)

Myanmar nungi nisung 700 tema Mizoram-i aru

Aizawl, June 28, 2021 (Agencies): Tesüiba hopta ishika jakdang Myanmar nungi nisung 700 dak tema Mizoram-i aitogo.

Tang Mizoram nung Myanmar nung nisung 10,025 jenoka lir, ta police ketdangsür kati ashi.

Mizoram state-i aiter rongnung mashisa aliba tetsütem, tanurtem, teintet rogo aser arishi küm 90 tain tem densema civilian teimba lir, ta ketdangsürisa ashi.

Myanmar nung 10,025 rongnung yimten yimsüsür 22 dena lir, ta paisa ashi.

June 14, 2021 nü Chin State indang chief minister Salai Lian Luai-ia Mizoram-i aru. Myanmar nung aika pei linuki tanaben meyipa ogo, ta ketdangsürisa shisem.

State police indang data ajanga June 15 aser June 26, 2021 tsüngda Myanmar nungi nisung 195 shi Champhai district-i aitba osang shia lir.

Mizoram nung district 11 rongnung Myanmar nungi arurtem ya district 10 aser Champhai district kija nung nisung 4,352 tashi jenoka lir, ta data nungsa shia lir.

Aizawl kübok community

housing complex ka nung Myanmar nung nisung 1,621 tashi anenzüka lir, ta data nungsa metetdaksü.

Ketdangsür kati ashiba agi, taküm February ita kidanger linük nung mitkartemi yimsü asütsü tenzükba sülen nürburtemi iba yimsüsüba nung manidaktsü longkak aitba mapang nungi Myanmar nung talisa Chin state nungi mapang shia telok tilala India arrtsü adena aiter.

Myanmar nung Mizoram nung jenoka alirtem rongnung tetsür, mashisa alir, tanur aser teintet rogo timba asüba yong, security forces ajanga parnok menokdangtet, ta ketdangsürisa ashi.

Champhai district nung Tuipuiral group of Young Mizo Association (YMA) indang president MC Lalramenga-i ashiba agi, Myanmar arrtsü nungi kilometer 20 shi pila orr Zawlsei tezülen makeshift camp 2 yanglutsüogo.

Meimchir dang aria bilemetsüba mapa sayua Myanmar nungi jena arurtem jenokdaktsüsu atema YMA nung temolungertemi iba makeshift camp yanglutsü.

Ano külen, Farkawn aser

Vaphai yimtsüng nung yimertemi refugee camp ka ka yanglutsü sentong lir, ta Lalramenga-isa ashi.

Tuipuiral group YMA telungtet nung yimtsüng 21 tashi lir, koba Champhai district nung East Tuipui Assembly constituency kübok item yimtsüng dena lir.

Tang Tuipuiral kübok yimtsüng 20 nung Myanmar nung nisung 1,419 tashi jenoka lir, ta Lalramenga-i metetdaksü.

Parnok (Myanmar nung) timbaka pei pei adianu/kinungertem den külemi lidar. Kasa mapang nisung kar taa agüja para kidang lidar aser anogoshia ayanglen senzüdar, ta pai ashi.

Tang Covid19 wara ajanga Mizoram yimtsüngtem telungi aittsü asoshi Myanmar nung telok kar dang memela asünung Indo-Myanmar arrtsülen Mizoram nung Tiau ayongkümlen parnok anenzüka lir, ta paisa ashi.

Parnoki pei pei talidak aser yimtsüng nungi bener aruba jang-o-tsü chiyonga aliba dak alaka Myanmar nungi arurtem nem NGOs aser temolungertemi chiyungtsü agutsüdar, ta paisa shisem.

Assam nung BPF-i Mahajot toktsüogo

Guwahati, June 28, 2021

(Agencies): Assam nung Congress-i aniba grand alliance nung Bodoland People's Front (BPF) madentsü telemtetba agiogo.

"Onoki Mahajot (grand alliance) den tesentaktep pilatsü telemtetba agiogo" ta BPF general secretary Prabin Boro-i ashi.

"Tang nungi onoki grand alliance den tesentaktep kecha mali. Onoki Assam Assembly elections jakdang parnok den teka amtepa liasü aser iba ya election atema dang liasü" ta pai ashi.

Assam Assembly election nung Congress-i aniba Grand Alliance-i tamakok anguba sülen ita ana majungdang BPF-

i iba telemtetba agi.

Honibarnü Guwahati nung Grand Alliance-i ayongba senden nung BPF maden.

2016 election magidang nungi BPF ya BJP den dena liasü saka yaküm küm tatemlen BJP den pilar Congress-i aniba teloktep nung aden.

BPF ya Bodo nung alidak tongtipang party ka lir aser 2006 o 2011 mapang Tarun Gogoi-i aniba sorkartem nung denogo.

2016 assembly election nung parnoki menden 12 nung takok angu saka takumbo menden 4 nung dang takok nguteta liasü.

BPF ya 2005 küm tentet aser iba sülen Assam state sorkar nung shilem magibajitang mezüng asütsü.

Golaghat Police-i drug mafia Pappu Ali puogo

Guwahati, June 28, 2021

(Agencies): Golaghat district kübok Farkating nung Police-i drug mafia Pappu Ali puogo.

Tiruwal Borphukan Khat tesem nung Pappu Ali'er ki teyangludak lir aser tawa tu iba ki nungi Golaghat Police-i temesepba mozü jenti nguteta liasü.

Police-i item temesepba mozü ngutetba sülen Ali ya jenshia senzü saka Farkating nungi police-i Pappu Ali apu.

Ozüng alema temesepba mozü shibelenba dak alia ashikülak/mapa tamajung inyakba nunga Pappu Ali dena lir ama temolung meleme bilemer.

Tesüiba küm ishika nung Pappu Ali-i item maparen ajanga rongsen jenti bendentetogo.

September 26, 2019 nü police-i Pappu Ali'er ki mita ao aser iba ki ajunga bushiba mapang tesem balala nungi miimbanga yur aliba pistol, grenade aser military

camouflage ngutet.

Golaghat tesem balala kübok özüng alema temesepba mozü shishilembaba inyaker aser State nung tanga district len temesepba mozütem belena ayokba maparen nung Pappu dena lir ta temolung malemer.

Iba tesem nung alirtemi ashiba agi özüng alema mozütem shibelenba ajanga Pappu Ali-i rongsen jenti bendena lir. Pappu Ali apuba osang angashia Golaghat nung alirtemi pelaba metetdaksüogo.

June 24, 2021 nü Sarupathar indang sub-divisional police officer (SDPO)-i anir Golaghat Police-i heroin aser temesepba mozü shibelener nisung pezü puogo.

Ibaji masüdag June 16, 2021 nü Golaghat deputy superintendent of police (DSP), headquarters-i anir Golaghat Police-i Merapani nung temesepba mozü shibelener nisung ana apu aser NDPS mozü süngiang 25,000 nguteta liasü.

Dibrugarh nung tanurtem dak Delta variant puteter

Dibrugarh, June 28, 2021

(Agencies): Assam kübok Dibrugarh district nung arishi küm 18 teküpok tanurtem atema COVID-19 teblemetsü tulu ajurua lir.

Tan ita tsüngda tanur pungu tashi COVID-19 ajanga süogo aser par asembo tanga tashidak liasü. Honibarnü ita terka tain kinü tanur ka Assam Medical College Hospital (AMCH) nung asü.

"Ita 11 tain tanur temang kanga mejungi liasü aser laji Tingkong nungi anir aru. Onok la ventilator nung ayu saka ghonda 6 lir la süadok" ta AMCH principal cum-chief superintendent Dr Sanjeeb Kakati-i ashi.

"Tang tashi nung tanur 60 tashi COVID-19 agi shiranga AMCH pediatric department nung anioka anepaluogo. Tanur pungu tashi asü aser onok department nung ICU yipden 50 renemdar" ta pediatric

department, AMCH nung associate professor Dr Aditi Baruah-i ashi.

"Tanur teimba ka dak Delta variant aliba putetogo" ta Integrated Disease Surveillance Programme atema Dibrugarh district surveillance officer Dr Aditi Baruah-ia metetdaksü.

"April 1, 2021 nungi tenzükur tanur 2300 dak COVID-19 aliba puteta liasü. Parnok teimba dak Delta variant aliba putet" ta Dr Aditi-isa ashi.

"COVID-19 wara tasembuba madoktsü kechiyong nütsüng yongsük teimba dak virus menaogo" ta Dr Gogoi-i metetdaksü.

"September-October tashi nung tensa süngjema akümtsü. Dibrugarh jila nung positivity rate 1% den tajemba kümogo. Dibrugarh kübok yimtsüngtem nungi nisung teimba dak COVID-19 puteter" ta Gogoi-isa ashi.

OFFICE OF THE CLARK MEMORIAL HR.SEC SCHOOL, IMPUR, NAGALAND (Estd: 1895)

ADMISSION NOTICE

Admission to class 11 (Arts) Notification. Interested candidate may avail the forms from :-

- School Office during office hour (i.e., 9:30-1:00 Pm)
- Eastern Book Depot, MTBA Church basement, Mokochung.

Subjects Offered

Special Features

- English
- Ao
- a. Pol.sc
b. History
c. Education
d. Economics
- Environmental Education
- Qualified, trained & dedicated teachers
- Hostel for both Boys & Girls
- Special emphasis is given in spiritual and moral education
- We strive towards Excellence in all round development of a child

* Forms can be submitted through the school email cmhssimpur1895@gmail.com

Sd/-
Principal, CMHSS, Impur



TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 29, 2021

India nem mesüdaktsürtem

Asenok Naga nungertem ya India yimten kübok aliba agi dang ashi, India nunger masü aser tereprangtsü aser sobalibaren kechiserna ajak nung temesüka memesük, anungji asenoki India nungera ta mesüner aser India küboka meliner. Ano, Assam ajangerbo India tesem aika nung India nunger tashitemeteteremi dena Nagaland ya India nung masü saka bendanger kin balakata ta bilemer. Iba jagi aiben India len senzüdang asenok ya India nungera ta shiaka India nungertemi mamanger. Aji oda, India yimtenibo Naga nunger aser parnok lushi ya India yimten telongjem nungi mechiokner saka India nungertemibo Naga nungertem ya India nunger masü asür ta asüba yongtsü nung, Naga nunger karbo anogo shia tesem ka nung mesüra ka nungbo timtem, takoksa aser maksü ajurudagi. Ajisüaka, asenok taküm jenjang ya jungjunga bilemdangra, India nunger tsüngdang tang ajuruba maksü dang nungi tuluba ajurutsüba ser nung, tia junger majungka, India nungertemi asenok Nagaland nung alir Naga nungertem ya India government-i yokba relief jang agi taküm alir ta memetetba agi aiben asenoki memeteti India nunger chanutem tsüngdang maksü tulu nungi kümzüker. Iba tiaji ngua taoba hopta nung asenoki iba osang kaket "Koma süla?" tapak nung, " Food & Civil Supply department nungi Relief jang ya magütsü anen nunga koma süla ?" ta asüba onük nung shisalemsatepogo. Iba tasüngdangba ya kaketreju tatidang nung mark ka jenjang langzüksü arunungbo, telangzübaji, " Nagaland nung yawara arula," ta langzü nung shitak süla ta bilemer. Iba tiaji kodang asenoki jungjunga bilemdangdir, asenok nüchiso indang jembiba onük ya yimten nüchiso masü saka tamasa asenok India nunger relief jang dak metaloker aliba sensak tia nung yagi nüchi kümatsülaa ta bilemer. Aji oda, kechikomaka ser India government-i relief jang agütsüba ya anen nungbo Nagaland nung alir Naga nungerbo relief jang seret nung sen asem agi chiyonga alir nübortemang masü saka government nung food & civil supply maparen repranger yimsüsür aser ketdangsertem dena kidang chipo metongdaksüsa sensak tia aiüsü. Asenok yabo kidang asenoki ak shibanger ajepba den talangkabo tepila mali, kechiyong asenoki alu mayimyonga aser mapa kecha meinyak kazüyonga, Naga nunger kibong shia India government-i ita sen agüja ayur nisung kakabo lir, anungji ita sen jagi relief jangji alia chiyonga kibongji otetter. Aji oda, Naga nungerbo relief yokba yagi kibong dang masü saka government dena aoer, kechiyong jang aser kerosene dak alaka nübortem nem jenjang dalang agi agütsütsü yokba chiyongtsü aser tagitarutsü tangabo nübortem nem magütsür aser nübortemi tebushia mebushir, anungji itemji ketdangsertem asoshi temoatsü akümer. Yamai asenok lia lia, azümasenba - azümasenba kümadoktsü aser aseni inyaka nungi aruba temoatsü madak akümketa pelateptsü melen India government-i agütsüba jang, wheat aser kerosene raktepang asenok ak kidang kiburi chi touktsüdang raktepba den kecha tebandang mali ka kümadoktsü. Aji oda, kar fair price shop nungi alir aser kar tsumartemi Dimapur nung godown balala nung jangbo relief jang saka tasepba jang bag-jiang balaka ta melener ayokba alir ta asenok ajak relief jang chiyongertem lir. Iba tensa tia ya, kodang asenoki asenoksasa tang Covid wara anema mokdangba mapang ajuruba kibong tia den medemdangdir, kiburi relief jangji magütsü nungbo asenokbo taküm melitetsü ta asenoki metetogo. Idakji asenok aoksar India government nungi relief jang manguyonga asenok taküm litetsüsa asenok mapa inyak tenzüksüla. Asenok yabo tanga lima nung atalokba ama rara aser yawara aruba agi pei ki aser pei lima toktsür talidak maka nemzür 'refugee' masü, anungji asenok yabo talidak tejangja akaba senso tajung ka ama 'relief' agi putusa putu tangar nem mesüdakjabo iba lima nung mamongtsüla. Atangji, India government-i linük nung sensakertem tia meteta jenjang dalang agi chiyongtsütem agütsür, ano state kar nungbo state government-i dena enoksemer jang seret nung senpak katia agütsür. Iba amaji angati ama, jenjang dalang agi chiyongtsü angubaji junger saka kodang asenoki asen government, asen lima aser asen kibong tangar relief agi taküm aliba jenjangji bilemdangdir, necktie agir body guard anir masamasaa senzütsüba jibo yutsür, yimdong nung tsüngsem semer senzütsüba jiba taaktsüka lir. Iba ama taküm jenjang ya asenoki asenoksasa maksü amai bilemetsüla aser India nem relief jang agi mesüdaktsüba maksü tia nungi asenoksasa adoktettsüla. Asenok kecha khuret mali tangar nem mesüdaktsüba alar aser kilir kolok nungi nüchi kuma arutetsüsa inyaksüba jiba mapa ka dang lir, ibaji aseni kechi akok, iba mapa nungji nendaka aser tanen makai meranga inyaksüla.

OLEMSABANG

TAIWAN BAPTIST AROGO NUNG INYAKBA AJANGSHIBA ASER INYAKYIM

~ Imliyanger Jamir

Okila

Tenzüker ajak dangi Yisu temiem salam abener. Kü tenung Imliyanger Jamir aser ni Chuchuyimpang nunger lir. Dimapur nung soa inet aser Dimapur Ao Baptist Arogo nung (town fellowship) züngsem lir. Kü kinüngtsu ya Taiwan tsür (Han) aser Tsüngremi tebur tanur ana moaja küm 2015 nungi Taiwan nung Tsüngrem tenzuka arudagi.

Küm mi ana ser metzü (2020) November nungi tenzuka ozü kibong Taiwan nung Taitung Baptist Arogo nung inyaka arudagi, kü teinyaktsü mapa ya mosü ta sa ajar Chinese oshi nung, kü tenzükba jiba International fellowship, Taitungnung pastor aser Chinese arogo nung Minister. English tekülem sentep abenba den külemi Lanur ministry dena repa abener. Aser ozü kinüngtsüi Education dept nung tenzüker. Arogo-i la nema lumsum agütsür.

YSS nung tentetsüsa kü nema maong agütsü nung kanga pelar. YSS ajanga asen lima arogo aser lokti melenshia aor aika angazüker. Taoba mapang arogo nung tenzükba maparen dak sentakba aika jembio go aser niatebilemba kar shiner.

Taiwan Baptist Arogo nung sannüker aser minister shimba inyakyim:

Arogo tenzüker shimba ya Arogoi pei sasa shimer. Arogo weekly report ajanga mesüra nübör ajanga osang prokshia résumé arogo office nung bendener. Candidature interview agütsür aser tatitanger temji deacon (chairperson) den deacons terok den Head pastor densema interviewji alir. Aji sür temulung süa lira arogo sentep nung Tsüngrem o jembitsu jaoker. Sentep mapang temer candidature-ji kima ken oadakja nübortem dang deaconi candidature den meeting agiba osang agütsürkülen nübortemi vote agütsür. Shimba osangji hapta ka lir candidature nem metetdaksür.

Tenzük nung ita asem tashi arogoi tendangba mapangsa agütsür, tenzüker jagi temulung süa metenzükra pa/la kecha kuli makai tenzükba mapa nung anendaktsütsü nübör dak tashi lir. Kodang nübortemi temulung süa hai haora kar tenzükdir pa/la contractji atsülangdaksür (extend). Mezüngbuba küm ka (1 year) atsülangdaksür. Aji ser küm 3, talangtiba küm 5 tashi contractji pa/la küm 65 matong tashimapang shia küm 5ji extend sa alir. Ita sen den health insurance fee 70% tashi arogo-i cover asür. Iba denji Labor insurance aser pension asoshi sen reünga ayur. Ordination (reverend) ji küm ana (2) temer kelen Deacon Board aser pastori anir recommend süa Baptist associationi agütsür. Parnok amangbaji iba ordination agia ano ministry balala nunga sadoksadoka inyaka otetsü mechinung ibaji agütsür. Aser iba asoshi tatidang tezüluba nung aser tasüngdangba nung agir.

Taiwan Presbyterian Arogo nung sannüker aser minister shimba inyakyim

Mapang tatsüka nia Presbyterian Church nunga shilem agia aser yaritepa liasü aser iba ajanga ni angazükba kar lemsateper. Taiwan Presbyterian arogo nungbo area esab parnok sub-association lir item ajanga sa laishir graduate asürtemmesüra asütsü purtem ajurutepepe arogo koba nung minister nungdaker, arogo tenüngji zülutsu aser candidature-temi koba arogo tenüngji agitetdir iba jagi aor. Aji sür kuma ana (2) mulungsoa tenzüker pa/la ordained sütsür. Arogoi ano ken vote agütsür contractji extend süa küm pezü (4) tashi tenzuka aor. Shiba südir süaka pa/la Presbyterian arogo nung tenzükna lira par/ lar arogoi Presbyterian arogo nung member ka asütsüla aser Presbyterian Church in Taiwan nungi affiliate asüba seminary ka nungi zünger graduate asütsüla. Minister inyaksü ka atema M.Div-bo asütsüla kechiyong M.Div azüngba mapang Presbyterian arogo indang tongtipang lesson sayur.

Missionary taküm aser Taiwan arogo

Taiwan arogo temi missionarytem ya pelashishia agizüker aser akümtsübu tulu agütsür. Saka mission inyaksüba jiba la/pa title ka melira, tat. agi., Reverend, Professor mesüra Pastor amaarogoibo kangabosa sabua mamshir aser leman sadok sadoka melapoktsür. Kechiyong Taiwan arogo asoshi titleji kanga tongtipang ta parnok züngshir. Ibagi YWAM (youth with a mission), CCC (campus crusade for Christ), telok balala jagi leman bushia pei sasa organization nungi ordain asür aser arogo den külemi Tsüngrem tenzüker. Ordination agütsüba jiba kanga tongtipang ka kümadoker. Missionary with skill aliba kanga agi tajungtiba kechiyong kodang missionary odir pa/la nübortemji Khristan dang masü saka tanga yimsü amangbapurtem alir. Skill amshia nübortem asoshi mapa tulu inyaktetsü aser iba den külemi Tsüngrem osanga agütsütetsü.

Ozü kibong ya ordination asoshi sarasadema atara. Kü tebilembabo, pa/ la koba arogo nung soa inet iba arogo nungi ordination asüba kanga tajungba aser aküm keta angur. Saka asen Ao arogo nungi ordination asütsü ya kanga dang tasak aser ibayongji ministry balala inyaksüba jiba leman mesademer. Tarutsü nükjidong nung asen Ao Arogo temia metetsü atema missionary aotsüpurtem mesüra church planting ama nübortem mangdang balala alir asoshi kokra ordain sür yokba tajungasütsü ta tebilemba ka shidanger. Iba kasa ola ya asen ABAM dangia yoknür. Tanü asüng ordain süa skill aliba kanga tongtipang kümogo. Iba den sendakba onüktem aikasa lir saka tang atemabo iba ya dang lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Congo kübok Beni yimti nung Tenla kidang bomb apok



Amongnü (June 28) Congo kübok Beni yimti nung aliba Tenla ki ka telung nung bomb apokba sülen tangokba noksa nung angur.

June 28, 2021: Amongnü (June 28) Congo kübok Beni yimti nung aliba Tenla ki ka telung nung bomb ka apokba lendong nung nisung ana yiruogo.

Africa nung aliba linük-Congo nung taküm May ita nungi sepaitemi telungpurtem anema sashia raraba ajanga tensa mejungi lir.

Osangbener den jembidang Beni nung police tongti, Narcisse Muteba Kashale-i, anepdang 6:00 ako meta bomb ji apok aser UN's mission to DR Congo nungi mongintemi bomb ji home-made bomb ka liasür ta onok dang shiogo, ta metetdaksü.

Beni nung vicar general, Laurent Sondirya-i, iba lendong nung nisung ana yiru, ta metetdaksü.

"Tenla kidangji tanurtem

indang sentong tuluka agitsü jakdang iba lendong atalok. Parnoki lokti tulu alidak lendong agütsüsü tebilemba liasü," ta paisa metetdaksü.

Bomb apokba ajanga Tenla ki kichiba aser sound system raksa.

Tang mezüing Beni territory nung Catholic Arogo Tenla ki bomb amshia amaker.

2013 küm nungi tenzüka tang tashi nung Allied Democratic Forces (ADF) telungpurtemi nisung 6,000 dak tema tepsetogo.

Taoba ita nunga ADF kiralongrartem anema jembiba atema Beni yimti nung Muslim nunger lenir ana kshetogo.

Congo linük nung telungpur telok 120 shi lir aser item teloktem rongnung ADF ya tamajungtiba lir. 1996 nungi 2003 küm tsüingda regional war

ana mapang nung item telok aika pokteta liasü.

Taküm March ita nung United States-i, ADF ya Islamic State den tesendaktep aliba telok ka, ta sangdongogo.

Hombarnü Congo army-i, Beni nung bomb lendong agütsüba ya Islamic State (IS) den tesendaktep aliba ADF teloki lir, ta metetdaksü.

Congo communication ministry-i twitter ajanga, tanabuba bomb ji taküm tenla agütsür kati pokdaksü, ta metetdaksü.

Army otongdar, Anthony Mualushay-i, "Bomb pokdaksüsangji Uganda nunger lir. Onoki melung melemteti bomb pokdaksüsang den aliba nisung ana puogo. Tena ajanga bomb pokdaksüsang maitsüji jangjaogo," ta metetdaksü.

Canada nung ano Catholic pur Tenla ki ana rongdokogo

June 28, 2021: Honibarnü (June 26) Canada nung ano Tenla ki ana rongdokogo; British Columbia nung aliba St. Ann Arogo Tenla ki aser Chopaka Arogo Tenla ki na ghonda ka dang tetsüingda itter meshimeshia rongdok.

Taoba Hombarnüa Canada nung National Indigenous People's Day amongba anogo nung kasa province nungsa Catholic Arogopur Tenla ki ana rongdoka liasü.

"Tamalen Tenla ki ana rongdokba tatalokba bushisüingdangdar, aser tang tashi nungbo shinga anema ken o mebenok mesüra shinga mapu," ta Royal Canadian Mounted Police Sgt Jason Bayda-i metetdaksü.

Canada nung taoba mapang Khristan residential school aika nung tasüming jenti aremba

bushitetba sülen Tenla ki aika rongdoker.

Sorkari senotsü agi yariba compulsory school temji Aso 19 aser 20buba mapang nung Khristantemi ketdangsüa liasü.

Osangbener den jembidang Lower Similkameen Indian Band Chief, Keith Crow-i, anepdang yakta Chopaka Arogo Tenla ki arongba osang pa nem metetdakja liasü aser pa Tenla ki tonga aodangbo meshi-meshia ajak rongdoker liasü, ta metetdaksü.

Tenla ki rongdokba atema Catholic Arogo züingsemtem kanga jashir, ta pai ashi.

May ita nung Tk'emlups te Secwepemc First Nation-i British Columbia nung 1980 küm Roman Catholic Administration-i lapokba Kamloops Indian Residential School nunga tanur 215

tasüming aremba leper ka ngutetba osang sangdonga liasü.

Taoba Brihostibarnü Cowessess First Nation-ia Saskatchewan nung taoba mapang Khristan residential school ka nung nisung tasüming 751 aremba leper nguogo, ta sangdonga liasü.

Canada nung akhidang aliba compulsory boarding school tem nung nisung jenti asübaji talisa school telung kanga memerükba agi liasü.

1863 küm nungi 1998 küm tashi nung lisopur tanur 150,000 dak tema tsüraburtem dang nungi meshizüka item residential school nung züingdaksü.

2008 küm tentetba commission kati, lisopur tanurtem aika pei kidangi meyipa maru, ta bushiteta liasü.

ANO GO ABEN TSÜNGREM DEN

Nai khrista den temulung asütsü akok

Shibai ni tashi itdaksür Pa dak ni ajak inyaksü akok. Filipi 4:13

Filipi arogoi pa tenzüka mapa nung yariba asoshi Pauli parnok nem tenüngsang agüja zülu. Yangi pai nübur dang pelaa alitsü ashi (t.4), kecha atema shisa mebulutsü ashi (t.6) aser ochi, akhümtsübu aser shidakba nung temulung ayutsü ayongzük (t.8). Idangji pa nungdak nung koda talubusa angu (rishikangshiba indang mejembi) iba indang ashi. Pai ashi, "Shibai ni tashi itdaksür Pa dak ni ajak inyaksü akok." Pai kechi tetezü ashir? Pai inyaknüba ajak inyaksü Khristai pa tashi itdaksür ta pai ashir asü? Ibaji masü! Pa peria akadang aser sensaka alidang Tsüngremi pa nem temulung süa lidaksüba indang pai jembi.

Yisu tenüing tetshia nai inyaknüba inyaksü iba tekong yagi ashir asü? MASÜ! Mapang tajung tamajung ajak nung Tsüngremi mulungba nai atalokdaksütsü Tsüngremi ne nem tashi agütsüba indang iba tekong yagi mejembir. Rishikangshi mapang nunga nai aremzüka Pai mulungba atalokdaksütsü akok. Kechi asoshi na aja iba nung rangloker nai tashi anga aser tamang agi apusora, nai takok angutsü, kechiaser Pai na tashi itdaksütsü. Khrista asoshi mapa kar inyaksü na tashi nungdakra Paul ama kümang, shibai tashi mait nunga temulung süa liasü.

"Aji asüning Khrista atema mekokmin nunga uludi" (2 Kor. 12:10).

Sarasadem: Oba, kü taküm nung Khrista aliba ajanga ni kechisarena nung temulung süa alitsü kü dang yariang. Amen.

"Chosen Witness" filmoshi 1,800nung sayutsü



June 28, 2021: Mary Magdalene-i kuli asüba nung ajemdaker yangluba animated film ka kanga nungtugu kümдар; "Chosen Witness" film ya taküm April ita nung Campus Crusade for Christ indang Jesus Film Project-i saya aser iba film ya oshi 1,800 dak tema nung adokogo.

Executive Producer, Elizabeth Schenkel-i ashiba agi, film tasenba ajanga Yisu Khristai inyakba ministry, Pa ashioksüba, asüba aser shia aruba otsü ashir, aser iba otsü ya Mary Magdalene-i kuli asüba nung ajemdaker yanglu. "Yisu Khrista tasü nungi shia aruba sülen Yisu mezüing ajururji la (Mary Magdalene) lir," ta Elizabeth Schenkel-i ashi.

"Yisui Pa shia aruba kuli asütsü atema nütsüingtem dangi la yoka liasü. Ibaji ajanga Mary Magdalene ya Yisu sülen anidakertem atema kulisür ka, ta jangjar," ta Schenkel-i ashi.

"Par mapang nung tetsürtem mezüingshi, saka Tsüngremi tetsür ka dang shimtet. Alima nung Khristar ministry pusemstü atema lai la taküm

rangben bendanga agütsü, aser mezüing kulisürji la aküm," ta Schenkel-i metetdaksü.

"Chosen Witness" ya ajanga lenla asem nungi Yisu kulisür. Lenla asemji- Mary Magdalene-i kulisüba, sendokbapurtem atema Pai inyakba aser Pa taküm otsü repringshiba lir.

Easter hopta nung iba film ya oshi 38 nung sayaba sülen ano oshi 250 bendenlokogo.

"US kija nung hopta asem tsüingda YouTube nung views 250,000 dak tema liasü," ta Schenkel-i ashi.

Jesus Film Project-i maneni iba film ya oshi aika nung sayaner, kechiyong iba film repringba ajanga nisungtemi Yisu indang taliba jangjatsü.

"Chosen Witness" otsü ya Barry Cook-i zülu aser Dom Carola-i direct asü.

"Chosen Witness" ya JesusFilm.org nung stream asür aser YouTube nunga oshi 38 nung sayur.

Jesus Film Project-i 1979 küm nungi tenzüka Khristan film tem adokba ajanga alima tesem ajungalen Khrista osangtajung proker.

Galwan nung taküm tenla agütsürtem kodanga mamatsü: Rajnath



June 28, 2021 nü Union Home Minister, Rajnath Singh-i Ladakh kübok Karu nung sepaitem semdangba mapang tangokba noksa nung angur.

New Delhi, June 28 (Agencies): Hombarnü Defence minister, Rajnath Singh-i, linük atema Galwan Valley nung taküm tenla agüja asür sepaitem kodanga mamatoktsü, ta ashi. Tang Rajnath Singh-i anogo asemnü atema Ladakh semdanga lir, aser tanü Karu Military Station nung sepaitem den jembidang pai, "Armed forces-i nüngdakba ajak India sorkari peritsütsü, ta ni

züngbong ashir," ta metetdaksü. Kidanger linüktem den mangatetep onük ajak ken o jembiba ajanga dang bentetsü atema meranga inyaksüla, ta pai ashi. Arrtsülen China den mangatetep adoka lia Amongnüa defence minister-i anüdoklen Ladakh nung sepaitem terenemshiba jenjang asadanga liasü. Sepai ketdangsertemi Defence minister den Army

Chief Gen MM Naravane na dang arrtsülen tensa aser Leh nung sepaitem terenemshiba jenjang metetdaksü. Defence minister-isa Leh nung Ladakh Autonomous Hill Development Councils (LAHDC), Leh, aser Kargil nungi ketdangsertem ajuru. Singh-i Border Roads Organisation (BRO)-i yangluba project aika semzüksütsü aser region nung aliba sepaitem den shisa lemsatepsü.

India nung nisung 40,845 dak Black Fungus putet aser 3,129 asü

New Delhi, June 28 (Agencies): Hombarnü Union health minister, Harsh Vardhani, tang tashi nung linük nung nisung 40,845 dak black fungus (mucormycosis) putetogo aser iba tashidak agi nisung 3,129 süogo, ta metetdaksü. Mucormycosis ya fungal infection ka lir, aser iba ya fungus Mucor ajanga adokdaksür. Ketdangsertemi ashiba agi, temang nung tema zübo, mi agi arongba zübo mesüra teküp timtem aliba tesem ajanga temang telungi fungus aitba sülen iba infection ya teküp nung adoktsü akok. Iba tashidak aketba tongti temaitsütemji- teni atangba, tejak mesüra tenipong ashiba, teni nungi neptzü tenakrem alua teshinem menemba, tenük merema akümba mesüra awakba aser tenüki junga manguba densema lir. Hombarnü high-level Group of Ministers (GoM) on Covid-19 pur 29buba senden amendang Health Minister, Vardhani-i black fungus agi shiranger 34,940 (shilem 84) dak coronavirus tashidak liasü, shilem (64) 26,187 dak diabetes

co-morbid liasü aser shiranger 21,523 (shilem 52.69) nem steroids agütsü, ta metetdaksü. Black fungus agi shiranger 13,083 arrshi küm 18-45 tsüngdapurtem (shilem 32) liasü, shiranger 17,464 arrshi küm 45-60 tsüngdapurtem (shilem 42) aser shiranger 10,082 (shilem 24) arrshi küm 60 ser temapurtem liasü, ta health ministry sangdong ka ajanga metetdaksü. Covid-19 vaccination dak sendakba nung Vardhani-i, "Covid-19 vaccination tsütsü India-i ano alizüng tasen ka tongteta US dang nungibo India nung vaccine timba agütsüogo. Yaküm December 14, 2020 nungi US-i vaccine agütsü saka India nungbo taküm January 16 nung ang vaccination tenzüka liasü," ta metetdaksü. Hombarnep 8:00 ako tashi nung India nung coronavirus vaccine dose ajak senteper 32,36,63,297 agütsüogo, ta paisa metetdaksü. Tesüiba ghonda 24 tsüngda India nung nisung 46,148 dak dang coronavirus putet aser tang teshirangdakpur 5,72,994 dang kümogo, ta pai ashi. (Maneni tapak 9 nung...)

West Bengal Angh Jagdeep Dhankhar agientsüla: Mamata

Kolkata, Aami/June 28 (Agencies): Hombarnü West Bengal Chief Minister, Mamata Banerjee-i, West bengal state Angh, Jagdeep Dhankhar ya ochimashir ka lir, anungji pa Angh menden nungi agientsüla, ta takhangba agütsü. Tawa Angh, Dhankhar-i North Bengal sema senzüba ashishia Mamata-i, state north tsütsü telemsa adokdaksütsü atema asalentong yanglur inyaker, ta aitsü. Trinamool Congress tongti lenir, Mamata-isa, Dhankhar-i North Bengal semdangba ya yimtenren dak sendakba sentong ka liasü, kechiyong pai

iba mapang nungji BJP nungi MLA tem aser MP tem dang ajurua liasü, ta metetdaksü. State secretariat nung osangbenertem den jembidang lai, "Pa ya ochimashir ka lir. 1996 küm Hawala Jain ken o nung pa tenüng-a densema lir. Kechiba Central sorkari pa ama ka Angh maneni inyakdaksür," ta ashi. "Jain Hawala ken o nung Angh tenüng densema lir, ajisüaka parnoki court-i oa iba ken o bentet. PIL ka benoka lir saka ibaji tang tashi anendaka lir. Nenoki kechi metetner? Pa ya ochimashir ka. Kechiba Centre-i pa ama ka Angh inyaksü melar? Ken o agütsüba

shidiji reprangdanga iba nungji pa tenüng densema lir asü maliar reprangdangang," ta lai osangbenertem dang ashi. "Kechiba pai ajungbena North Bengal sema senzü? North Bengal nung telemsa adokdaksütsü atema asalentong yanglu inyaker ta ni bilemer," ta lai ashi. Dhankhar Angh menden nungi agientsü atema mepishia lai Centre dangi shidi aika zülüogo, ta metetdakja lai, "Linük temzüng nung aliba ama ni pa maneni ajurutsü aser jembitsü. Ajisüaka ni züluba shidi nung ajemdaker Union sorkari inyaksüla," ta ashi.



Visakhapatnam, June 28, 2021: Taoba mapang Ato kilonser, PV Narasimha Rao sor küm 100 ajungba anogomong nung linük tatong tir, M. Venkaiah Naidu-i Narasimha Rao indang kürakyanglu nung narozük azüktsüba noksa nung angur.

Punjab nung AAP-i electric light angati agütsütsü: Arvind Kejriwal

New Delhi, June 28 (Agencies): Hombarnü Delhi Chief Minister aser AAP tongti, Arvind Kejriwal-i, sangküm Punjab assembly election nung AAP-i takok ngua sorkar kümra state nung nisung ajak nem electricity light angati agütsütsü, ta metetdaksü. Sangküm February mesüra March ita nung Punjab nung assembly election agitsü. Delhi Chief Minister-isa, pai Mongolbarnü Chandigarh semdangba mapang nung ang osang aika tejangja metetdaksütsü, ta ashi. Osettsüset nung jenjang kanga atuba agi Punjab nung tetsürtem kanga mepelar, ta shia Kejriwal-i Punjabi oshi nung twitter ajanga, "Delhi nung

onoki kibong shia nem electric light unit 200 angati agütsür. Tetsürtem kanga pelar. Jenjang kanga atuba agi Punjab nung tetsürtem mepelar. Punjab nunga AAP sorkari electricity light angati agütsütsü. Asüng Chandigarh nung ajurutepd," ta metetdaksü. Tamalen Arvind Kejriwal-i, Punjab assembly election nung party nungi chief minister candidate ji Sikh nunger rongnungi asütsü, ta metetdakja liasü. Chief minister candidate dak sendakba nung tasüngdangba ka langzüdang Kejriwal-i, "Iba atemaji party telung nung o lemtepdar, mapang tatong nung nenok nem iba osangji metetdaksütsü," ta langziua liasü.



June 28, 2021 nü Lucknow nung aliba Raj Bhavan nung Uttar Pradesh Angh, Anandiben Patel-i linük Tir, Ram Nath Kovind aser pa kinüngtsü, Savita Kovind na agizükba noksa nung angur.

Al Shabaab telungpurtemi Somalia nung nisung 30 tepset

Mogadishu, Aami/June 28 (Agencies): Somalia indang Islamist al Shabaab teloki Deobarnü linük kübok Galmudug state nung jila ka amakba nung nisung 30 tepsetogo, ta security ketdangsür kati ashi.

Telugpurtemi Galmudug kübok Wisil jila nung military base ka gari nung bomb inoker amakba sülen telungpur aser sepai na tsüingda rara adok, ta Galmudug nung military officer Major Mohamed Awale-i, Reuters dang ashi.

"Parnoki gari ana nung bomb inoker base amak aser iba sülen ghonda ana dak tema khatapa liasü," ta pai ashi.

"Gari nung bomb inoker bener aruba amakba ajanga military indang gari raksatsü.. Sepaitem hadir teperi bener renema liasü aser ano teyari talila arua al Shabaab züingsemtem mintok," ta pai ashi.

Iba rara nung sepai 17 aser civilian 13 densema nisung semer asü, ta Awale-i ashi.

Al Qaeda den sendaktepa aliba al Shabaab telok ya Somalia nung küm ter dak tema rara arudar aser parnoki linük nung centre sorkar atsüingtoka Islamic sharia ozüing benoker parnok kübok yimsüsüba ka amenokner.

Al Shabaab telungpurtemi, gari kanga bulua senzüsenpongba tesemtem, hotel aser military base tem densema civilian aser military mapangshia maka arudar.

Somalia sorkari iba tatalokba aitsüogo aser ashiba agi, iba rara nung al Shabaab züingsem 41 khasetogo.

Iba lendong nung yirurtem tayimtsü ajanga linük yimtiba Mogadishu-i temang anepalutsü atema belener ogo, ta kasa sangdong ajanga metetdaksü.

Al Shabaab teloki parnok indang Radio AlAndalus ajanga iba lendong adokdaksüba nangzükogo aser ashiba agi, parnoki sepai 30 dak tema khasetogo aser ano sepai 40 dak tema yirutsüogo.

Dhaka nung ki ka poksaba bushisüngdang

Dhaka, Aami/June 28 (Agencies): Dhaka nung ki pa poksaba atema Bangladesh ketdangsürtemi bushisüngdang tenzükogo, kong nisung tenet asü.

Bangladesh yimtiba kübok Moghbazar district nung Deobarnü lendong ya dokan, showroom aser nija office tem aliba storey pezü ki alidak sorochiokdang amshiba gas ajanga atalok südi, ta bilemer, kong nisung ter dak tema yirua liasü.

City bus asem nung passenger mener ki tejaklen traffic agi marakzüteti lia lendong ya atalok, aser indangji bus ya raksatsü aser anasa aliba ki nunga kongshia liasü.

Nisung 12 temang kanga mejungi rongsar lir, ta Dhaka Medical College Hospital nung burn and plastic surgery unit tekolakba, Samanto Lal Sen-i ashi. Iba lendong bushisüngdangtsü atema züingsem pezü agi akumba telok kati Hombarnü kuli kar bushia liasü, ta Fire Service and Civil Defence Department nungi ketdangsür Debashish Bardhan-i ashi.

Iba telok yagi anogo tenet tsüingta lendong adokba osang

tejangja bushir agütsütsü, aser bushisüngdang temi ground floor nung aliba restaurant ka nung cooking gas nungi adok südi, ta bushisüngdang temi temolung melemi bilemer, ta pai ashi.

Tebilemba tamajung nung lendong agütsüba indang kuli kecha nguteta mali, ta Bangladesh police force tekolakba, Benazir Ahmed-i ashi. Saka tapokba oset nung mongintemi bushisüngdang tenzüktsü, ta pai ashi.

"Bushisüngdangba osang tatembang kati aruba sülen metetdaksütsü," ta ashi.

Public Works department nungi civil engineer temia ki teraksa ya asadangogo, koba küm 60 shi tejakdang yangluba liasü. Bangladesh nung junga anepalu mesüi 'gas leak' asüba aser ozüing sülen manidakba ajanga iba ama lendong ataloka nisung takum samaba ya tang tasen ka masü.

Taoba küm September ita Dhaka nungi south tsütsü kilometer 25 pilar Narayananj nung aliba mosque ka nung iba ama lendong ataloka nisung 33 asü.

Taliban-i Afghanistan amokbangra Pakistan-i arrtsü shibangtsü: Qureshi



Islamabad, Aami/June 28 (Agencies): Afghanistan nungi US sepaitem atsüingniba sülen Taliba-i sorkar atsüingra, linük tejangraba kümzükba ayutsü atema Afghanistan den arrtsü shibanga ayutsüsa akümtsü, ta Pakistan foreign minister Shah Mahmood Qureshi-i ashi.

"Onoki arrtsü shibanga ayutsü; linük tejangraba kümzükba ayutsüla," ta Qureshi-i ashiba Associated Press sangdong ka ajanga metetdaksü.

Qureshi-isa, Afghanistan nung Taliban-i timtem tulu bener arutsüba sülen Pakistan-i Afghan nung refugee million 3.5 jenokdakja lir, saka joko ojang dak agitetsü, ta ashi.

Tir Joe Biden-i April ita

sangdong ka ajanga US-i September 11 nü tashi nungbo Afghanistan nungi sepaitem ajak anintsü ta shiogo. September 11 nü twin tower amakba sülen US nung sepaitemi kiralongrartem azüoktsü atema Afghanistan nung inyaksangshia aruogo aser US teyari melena Pakistan-ia kiralongrar den rara nung teyari agütsüogo.

Ato Kilonser Imran Khan-i, Taliban-i sepai tashi amshia linük atsüingtsü merangra Pakistan-i Afghanistan den arrtsü shibanga ayutsü, ta osangbener dang ashiba sülen anogo ka lir foreign minister-ia kasa o jembio.

"Taliban-i sepai tashi amshia Afghanistan atsüingtsü

merangra koda? Aji ta sera onoki arrtsü shibanga ayutsü, kechiyong arrtsü nung atsü atsüogo aser arrtsü shibanga yutetsü, koba taoba mapangbo lapoka liasü. Pakistan-i mepetmesü nung shilem maginer aser refugee tem senoka maitdaksüner," ta Khan-i ashi.

Durand Line koba ajanga Pakistan aser Afghanistan na lemdanger, iba tesem nung Khan-i yimsüsü tenzükba sülen atsü atsüba ajanga iba tesem ya linük ana tsüingda mapangshia mangatettep adokba tesem ka kümogo. Afghanistan-i ashiba agi, British Colonial administrator Sir Henry Mortimer Durand-i 1839 küm arrtsü lateta toktsüba ya shidak masü.

Kasa mapang nung kilometer 2,640 talang atsü atsüa aliba ajanga Taliban-i linük atsüingra Pashtuns nung refugee tem senoka aitba nokdangtsü ta amanger. 1989 küm Soviet Union-i parnok sepaitem Afghanistan nungi aninba sülen linük nung civil wara tulu ka adok, aser iba ajanga Afghan nung million aika Pakistan-i jena aotsüsa aküm. Khan aser pai aniba sorkari, US nung sepaitemi Afghanistan toktsüba sülen kasa tia ajurutsü ta tsüba bilemer aser tang kanga aritepa arrtsü nung atsü matsüi aliba tesemtem atsübangtsü merangdar.

Sweden ato kilonser menden nungi aluogo

Stockholm, Aami/June 28 (Agencies): Sweden indang Social Democrat ato kilonser küm tenet tashi yimsü süa aruba sülen mapa yutsüogo, shibai nisung alitsü ki tasen yangluba nung 'para' meshiba azüoktsü atema sentong yangluba mechi taoba hopta vote of confidence agiba nung tamakok ajurua liasü.

Hombarnü Stefan Lofven-i mapa yutsüba ajanga parliament speaker nem ato kilonser tasen ka bushitsü mapa agütsüogo.

Housing market plans atema

Left Party-i par centre-left sorkar yutsüba sülen parliament nung June 21 nü vote of confidence agi aser Lofven-i tamakok ajuru, koba Sweden lenir mezüingbubai iba tamakok ajuru pa akum.

Rental market ozüing agienba ajanga kanga kera jenjang temloksü aser takar o sensaker tetsüingta tali aittsü, ta Left Party-i nokdak.

Lofven mapa nungi anenba ajanga centre-left aser centre-right telok anaprongi sorkar tasen ka tentetsü asoshi jembishinü tenzükogo.

Parliament nung Lofven busemer tasen bushitsü asoshi Hombar aonung tashi mapang liasü, saka Swedish Constitution agi pa dang melaba ama pai election mayongzük, aser sorkar tasen ka metentet tashi pa ya caretaker ka ama inyaka atatsü akok.

2018 küm nungi parliament speaker inyaka arusang Andreas Norlen-i party lenirtem dang sorkar ka tentetsü ashitsü. Aser iba maangka agütsütsü atema pa kisüingi telemtetba agitsü.

Riksdagen nung menden 349 aliba nungi menden 100 nguteta aliba party tulutiba nung Lofven ya tekolakba lir, aser pai maneni iba maparen atema jembitenzüktsü imlar.

Arishi küm 63 tain Lofven ya 2018 küm nungi Greens den loktepa sorkar nung tekolakba amai arur, shibai centre-right party tila ana aser Left Party ajanga nungitba nung metaloka liasü.

Tang centre-left aser centre-right blocs ya parliament nung kasasa lir aser general election agiba nunga temelenshi ka marutsü amai ajiteter.

2018 küm Sweden indang general election tesüsaba agir sorkar ka tentetsü asoshi Lofven-i ita pezü agia liasü.

Tang Sweden nung 'housing crisis' adoka lir aser kimong-lushi aser ki-o-jen nung sen kanga sashia meshir.

Tashidak wara agi alima tesem ajunga sünger nüburtem timtema aliba mapang jenjang temlokba ajanga Lofven'er sorkari ozüing agientsü sentong busema liasü.

Yimti tulutem nung jenjang tali temlokba azüoktsü nükjidong nung Sweden nung ki para atema ozüing tesashi benoka lir, aser iba yongji rental market nung ki-o-jen yanglurtem mepelai akum.

Rental contract atema nüburtemi küm aika atatsüsa akumer aser sen tali temlokba ajanga ki-o-jen alitsü tali tasakba akumer.



Toronto nung aliba Scotiabank Arena nung mass vaccination clinic ka nung nüburtemi COVID-19 mozü agiba mapang tangokba noksa nung angur. Toronto jila kübok Scotiabank Arena nung aliba COVID-19 vaccination clinic nung Mongulbarnü COVID-19 mozü doses 26,771 agüja anogo ka nung mozü timtib agütsüba otsü yanglutet, ta ketdangsürtemi ashi.

AR-i Kiphire nung vaccination drive ayongzük



Kiphire, Aami/June 28, 2021 (TYO): HQ IGAR (N) kübok Kiphire Battalion - Assam Rifles den District Task Force Kiphire longjemer Hombarnü (28.06.2021) Zisaji Presidency College, Kiphire district nung Covid Vaccination den atongsema awareness drive ka ayongzükja liasü, ta sangdong ajanga metetdaksü.

Dr. Pewezo Khalo-i anir iba Vaccination drive agia liasü. Kasa mapang, Kiphire Battalion ajanga iba drive asoshi maparen achaayangba densema medical team atema süngo jemtsü

anepalutsüogo. Iba Vaccination drive nung arishi küm 18 nungi 44 tsüngda nisung 200 shi COVISHIELD mezüng dose agütsüogo. Iba drive nung tajangzük angur rongnung Zisaji Presidency College, Kiphire indang staff aser kaketshirtem dena lir.

Iba sentong takok ngua agitetba atema, Civil administration aser Civil medical team nati Kiphire Battalion dang pelaba metetdaksüogo.

Maneni, kasa anogo, HQ IGAR(N) kübok Kiphire Battalion - Assam Rifles-i Mimi

yimtsüng nung yimertem den sensaksemba sentong ayonga agiogo. Lisopurtem teka mapa (handicrafts) ajungkettsütsü nükjidong nung, Assam Rifles-iba sentong ayongzükja liasü. Teka mapa dak sendakba maparen balala indang nung sensaksemba aser rongsekettsüng ajungkettsü asoshi item mapa tim nung amshitsü asoshi, team-i yimertem ajungshia liasü. Iba den külemi, Covid Awareness dak sendakba nung onük tem benoka sensaksemogo, ta kasa sangdong nung shia lir.

Boney Kapoor-i project ka tenzüktsü

Mumbai, Aami/June 28, 2021 (Agencies): Nüngtugu Mollywood film ka tanaben yanglutsü atema Boney Kapoor-i maparen achaayangdar. Superstar Mammooty-i tongti shilem agiba political drama - 'One' yanglutsü asoshi Boney-i 'rights' nguogo. Kasa mapang, India oshi ajak nung iba film yanglutsü pai temeden angu.

Taküm April ita 'One' film ya Netflix ajanga sayaogo. Santhosh Vishwanath-i direct asüba political drama nung Murali Gopy, Joju George, Mathew Thomas, Siddique, Ishaani Krishna, Nimisha Sajayan aser Gayatri Arun

nungeri tongti shilem agir.

Etimes sangdong ajanga angazükba agi, Hindi oshi agi tanaben yanglutsü aliba film nung star tetemjen ka nem shilem agidaksütsü jembidar. Paras Publicity indang Rajesh Vasani-i pa tembar Boney dang 'One' yanglutsü ajungshia liasü.

Boney-i South industry nung tesendaktep tajung yanglua lir, ta Team tenüing nung, Vasani-i kuli agütsüogo. Nüngtugu film producer, Boney-i law drama - Vakeel Saab takok ngua yangluogo. Iba film nung Pawan Kalyan-i tongti shilem agir.

Telugu oshi nung yangluba film ya 2014 indang Hindi film - Pink nung ajemdaker yangluogo. Pink nung Amitabh Bachchan-i tongti shilem agiba ajaki jangjaa lir.

Boney-i Ajith Kumar indang taruba film - Valimai ya Tamil nung yanglutsü. Iba den külemi,

pai Ayushmann Khurana indang Bollywood film Article 15 - Tamil nung yanglutsü asalentong yangludat. Iba project nung actor Udhayanidhi Stalin nem tongti shilem lezmüktsütsü, ta Vasani-i shisem.

Ajay Devgn-i tongti shilem agiba 'Maidaan' tangokmar sülen, Boney-i Helen' project tenzüktsü. Iba film nung Boney'er jala Janhvi Kapoor-i tongti shilem agitsü. Boney-isa par jabaso den longjemer 2019 küm sayaba Tamil film - Comali, hindi oshi nung yanglutsü.

Maneni, sangdong ajanga angazükba agi, Mammooty indang 'One', koba Hindi oshi nung yanglutsü, iba project maparen 2022 küm tetenzüklen nungi tenzüktsü ama asadanteter. Mammooty-i iba film nung Kerala indang CM ama shilem agiogo.

Pungro nung vaccination drive agi

Kiphire, Aami/June 28, 2021 (TYO): Additional Deputy Commissioner, Pungro, Abhinav Shivam, IAS-i anir Hombarnü (28.06.2021), Pungro jila nung sensitisation program aser vaccination drive ayonga agiogo, ta sangdong ajanga metetdaksü.

ADC-i ashiba agi, Administration, Medical Team kübok ward Chairmen, lokti lennir tem den telongjem nung inyakba ajanga, nüburtemi social media nung olulu mesüra tiyazü osangtem angashi arendaka aser tsüba bilemba atema chichiba osang tejangja sangoktsütsü akok.

Sensitisation sentong agir

sülen, vaccination drive agia liasü. Shivam-i ashiba agi, Pungro town sülen, tanga yimtsüngtem nung vaccination drive agitsü tebilemba lir.

Iba drive sentong nung, temsüa alir nisung 205 tashi ajangzükogo. Vaccination drive takok ngua agitetba atema, ADC-i taoba mapang YTC Chairman, Shelimthong; YTC, Executive Chairman, Makhezo; PPF, Khongsu; 2nd Hd. GB Shehota; Mission Ward Chairman, Shojiba aser Pungro town indang ward Chairmen ajak dang pelaba metetdaksüogo, ta kasa sangdong nung shia lir.

Pelaba Lemsateper

"Aser Ni Kibuba Kidang Teti Alitsü"
- TENÜNGSANG KEN 23:6



ASÜR. I. MASAMEREN IMSONG (MERANGKONG)
(15/08/1955 - 11/06/2021)

Onoki kanga meimba obala mapang tatsüka shirang dang aser pa Kotak nung alitsü atema onok toktsür aodang ozü den nübo, senotsü aser sarasadem agi yariteper ajak dang kanga pelaba iba sangdong ajanga metetdaksü.

Agüja alirtem dang onoki kangasa pelaba shisemer.

1. Ao Senso Telongjem, Bangalore.
2. Khristaer Arogo, Bangalore.
3. Ao Sarasadem Telongjem, Bangalore.
4. HCG, The Specialist in Cancer Care Bangalore.
5. Merangkong Senso Telongjem, Dimapur.
6. Merangkong Senso Telongjem, Tuli.
7. Tuli Lenden Baptist Arogo.
8. Merangkong Baptist Women Ministry.
9. Asensor Telongjem Tuli.
10. Mr & Mrs. Supongchiden Yaden, Director of Employment & Skill Development.
11. Mrs & Er. Imnajungba Jamir, ONGC Delhi.
12. Mr. Takosunep Imsong (Unger) President, Ao Senso Telongjem, Bangalore.
13. Mr & Mrs. P. Anung Yaden, Dimapur.

Onoki nisung ajak tenüing teta pelar ta meshiteter, saka Tulusang Tsüngremi nenok ajak molamoshia moajang ta ozü sarasadem.

**Temeim Kinungtsü, Jabasotem & Kinungtsütem,
Semchirtem & Kinungertem**

MULUNG NEN O

Onoki teti meima aliba, asür **Supongsangba** (Dibuia), pa mapang talangka shiranga alidang aser iba akümüli nungi pila orr onok mangyim jashi nung alidang, kiyonger, medemer aser temulunger kwinakati nungita yaria aser lenmang balala ajanga ozü mulung süneptsüogo, nenok ajak dang kinungertemi pelaba lemsateper.

Onoki item tentettem dang alakteta pelaba shisemer:

1. KABA
2. DABA
3. Notun Bosti Ao Khel Council
4. Women Department Dibuia Baptist Church
5. Kohima Dibuia Senso Telongjem
6. Kohima Dibuia Fellowship
7. Dimapur Dibuia Senso Telongjem
8. Dimapur Dibuia Fellowship

Tagizüker dang nungibo tagütsür kanga agi temoatsüba asünung, Tsüngremi nenok ajak molamushia moajangma.

**Temeim,
Adianutem, Kinungertem aser Anuk-Apangtem.**



India nung nisung 40,845... (Tapak 7 nungi...)

Kasa senden nung NITI (National Centre for Disease Control), Dr V Control), Dr Sujeet K Singh-i K Paul-i mask agiba aser teka states aser UTs shia nung Covid merüka ayuba tajangzük balala osang tejangja metetdaksü liasü. metetdaksü aser Secretary Senden nung adenertem (Health Research) aser rongnung Neerja Sekhar, Director General (ICMR), Dr Additional Secretary, Information & Broadcasting, Hardeep S Puri, Minister of Civil Aviation, Nityanand Rai, Minister of State, Ministry of Home Affairs aser tashidak putetdar, ta Minister of State Health, Ashwini Kumar Choubey nungera densema liasü.

Senden nungsa Director

Sangpur aser Yakor nung vaccination drive agiogo

Shamator, Aami/June 28, 2021 (TYO): Medical Officer, Shamator, Dr. Mhathung-i anir CHC, Shamator ajanga Deobarnü (27.06.2021) Tuensang kübok Sangpur aser Yakor yimtsüng nung Covid vaccine sensitization aser vaccination drive ayonga agiogo.

Iba drive mapang, yimtsüng anaprongla nung, Dr. Mhathung-i vaccine agiba indang tongtibangtem tongmelang agi rasa ashi; aser tangba mapang, SOPs agi melaba ama lokti nungi pilar alitsü, talisa telok sentong mesüra kibok-kisemba akok tashi paidoktsü asoshi pai sentong nung adenertem ayongzükja liasü.

Iba vaccination drive mapang, temsüa alir nübura aikati tangatetba tajung nung mozü agiogo, ta sangdong ka ajanga metetdaksü.

T20 World Cup India nungi UAE belener aotsü: Ganguly Deepika Kumari tanaben World No.1 kümogo



New Delhi, Aami/June 28

(Agencies): COVID-19 wara pokteter aliba ajanga India nung asayatsü aliba T20 World Cup UAE-i belenerogo, ta BCCI tir Sourav Ganguly-i Hombarnü PTI dang ashi, aser iba ajanga October-November nung WC ayongzüka asayatsü aliba dak sendakba nung ken o mejangjai aliba jangjatsüogo.

"Onoki ICC dang T20 World Cup United Arab Emirates-i belener otettsü, ta officially osang agütsüogo. Inyakyim ajak tang tembanga inyakdar," ta Ganguly-i ashi.

"Asayamung dak sendaka alitem ajak health dak sendakba nung kümzüka toktsütsü asoshi

temulungdang yur iba telemtetba agiogo," ta pai ashi.

Ajisüaka BCCI-i achayanga iba asayamung asayatsü.

October 17 nü nungi asayamung tenzüksü asoshi tembanga jembishiner asü ta asüngdangba mapang Ganguly-i, "anogo ishika tsüngda onoki inyakyim ajak tembanga inyaktsü. October 17 nü asayamung tenzüksü atema tembanga mejembi lir," ta ashi.

ICC otongdar katia asayamung tenzüksüba anogo tang tashi melemteti lir, ta ashi.

India nung COVID-19 tensa kanga mejungi aliba apir ICC-i iba ita tetenzüklen BCCI nem

asayamung ayongzüka asayatsü atema telemtetba ka agütsü asoshi hopta pezü agütsü.

PTI-i May 4 nü iba asayamung UAE-i belener aotsü ta mezüng sangdonga liasü. Wara pokteter ajanga IPL thinenba sülen iba telemtetba agi. IPL tanabuba shilem September-October ita UAE nung asayatsü telemtetba agiogo.

India nung health dak sendakba nung teblemetsü aika aliba apir lintük 16 asayatsü aliba asayamung ya yimti teku tashi nung ayongzüka asayatsü tasak asütsü, ta bilema liasü.

ICC-i asayamung atema Dubai, Sharjah aser Abu Dhabi nung renemshi tenzükatokogo.

Qualifying round Muscat nung asayatsü akok aser iba ajanga IPL tanabuba shilem asayaba sülen pitch tem tasen kümshitsü atema mapang peria agütsütsü.

IPL asayamung UAE-i belener aoba sülen T20 World Cup-a belener aotsü ta bilema liasü, kechiyong iba mapang tsüngda COVID-19 wave tasembuba ajanga linük kongshitsü akok ta tsübua bilemer.



Aami/June 28, 2021

(Agencies): India tsürtem rongnungi nungtugu archer Deepika Kumari, Hombarnü sayaba global rankings nung temaba jenjangi tuogo. World Cup Stage 3 nung gold medal asem akokba sülen lai iba jenjang tanaben ajangzüktetogo.

Ranchi nungi arishi küm 27 tain asayar shibai 2012 küm mezüngbuba temaba jenjang ajangzükteta liasü, lai Deobarnü recurve events asem; tetsür kija asaya, team aser tarep asaya nung gold medal ngutetogo.

"Iba takok ajanga Hombarnü world rankings sayaba mapang Deepika temaba jenjangi atutsü," ta Deepika-i gold asem tashi akokba sülen World Archery-i parnok indang official handle nung tweet asü. Deepika-i mezüngbuba Ankit Bhakat aser Komalika Bari na den tetsür recurve team asaya final nung Mexico akok.

Iba sülen lai kinungbo Atanu Das den külemi tarep temeyoktep asaya final nung Netherland nunger tarep Sjef van den Berg aser Gabriela Schloesser na 5-3 agi koka gold

medal angu. Tatemsa tetsür kija asaya nung Ranchi nungi asayar yagi final nung Russia tsür Elena Osipova 6-0 agi koka tetsür recurve asaya nung asaya asemprongla nung gold medal ngua liasü. Lai tang tashi nung kija asaya nung World Cup gold medal pezü kokteta lir.

Ajak senteper lai World Cup nung gold teku, silver 12 aser bronze medal tenet kokteta lir. "Tang mezüngbuba ni World Cup nung medal asemprongla koktetogo. Ni kanga pelar saka kasa mapang nung ni maneni renloka aotsü nungdaker, kechiyong onok asayamung tongtibang kar nung shilem agütsü anunga lir," ta Deepika-i PTI dang ashi.

Dola Banerjee sülen Deepika-i 2012 küm mezüngbuba temaba jenjang ajangzükteta lir. Antalya, Turkey nung recurve World Cup kija asaya nung gold medal anguba sülen la temaba jenjangi atu.

India tsürtem rongnungi la kija taruba ita Tokyo Olympics nung linük tenüng nungi asayatsü.

BWF-i India Open, Hyderabad Open thitsüogo

Aami/June 28, 2021

(Agencies): Badminton World Federation (BWF)-i Hombarnü India Open Super 500 aser Hyderabad Open Super 100 asayamung thitsüogo. COVID-19 wara pokteter aliba ajanga season nung tanungba asayamungtem kümzüksü atema BWF-i international calendar yanglushir sangdongogo.

USD 400,000 India Open, koba Tokyo Olympics atema qualifiers ka liasü, iba asayamung ya May 11 nungi 16 tashi asayatsü liasü saka linük yimtiba nung COVID agi shiranger tali akümba ajanga April ita thinena liasü.

USD 1,00,000 Hyderabad Open ya August 24 nungi 29 tashi asayatsü liasü.

Ajisüaka Syed Modi India International Super 300 tournament, koba October 12 nungi 17 tashi asayatsü asoshi lateter lir, iba asayamung yabo asayatettsü akok.

Tanga sangdong ka nung BWF-i Hombarnü Sudirman Cup Finals, Finland nung September-October ita asayatsü aser season-ending World Tour Finals Indonesia nung asayatsü ta metetdaksüogo.

Sudirman Cup Final aser World Tour Finals naprongla China nung asayatsü liasü, saka China nung COVID-19 dak sendakba tenokdangba tesashi benoka aliba ajanga BWF-i iba asayamung ana tanga linüki belener aotsü telemtetba agi.

BWF-isa, World Championships koba Spain nung December ita asayatsü lir, iba asayamung ya hopta ana thinener asayatsü, ta metetdaksüogo.

"COVID-19 dak sendakba tenokdangba tesashi agütsür aliba ajanga taküm China nung asayamungtem ayongzüka masayatettsü. Anungji BWF Sudirman Cup Finals 2021 aser HSBC BWF World Tour Finals 2021 atema tanga yimti shimogo," ta BWF-i ashi.

"Finland kübok Vantaa yimti nung Hopta 36 lir (26 September 3 October 2021) Total Energies BWF Sudirman Cup Finals 2021 asayatsü," ta kasa sangdong ajanga metetdaksü.

Iba sülen Thomas & Uber Cup Finals 2020, Denmark kübok Aarhus yimti nung asayatsü (October 9-17) koba taoba küm thinena liasü. Thomas & Uber Cup tembangba sülen World Tour events; Odense nung DANISA Denmark Open (October 19-24), Paris nung YONEX French Open (October 26-31) aser Saarbrücken, Germany nung SaarLorLux Open (November 2-7) asayatsü.

BWF-i, Thailand mesüka Indonesia nunga bio-bubble ka yanglutsü, kong Bali nung World Tour Final densema Asian Leg asayamung ana ayongzüka asayatsü.

Indonesia Masters November 16 nungi 21 nü tashi asayatsü aser Indonesia Open

November 23 nungi 28 tashi asayatsü aser iba sülen December 1 nungi 5 tashi World Tour Finals asayatsü.

"Taküm atema tatembangbuba asayamungji Huelva, Spain nung December 12 nungi 19 tashi TotalEnergies BWF World Championships asayatsü," ta BWF-i metetdaksü.

Euro 2020: Czech Republic aser Denmark na quarter-i iogo

Aami/June 28, 2021

(Agencies): Deobarnü Budapest nung Euro 2020 round of 16 nung goal 2-0 agi Czech Republic makokba sülen Netherlands asayamung nungi tuguogo.

Tomas Holes-i goal ka idaktsüba den pai assist sütsüba ball ka Patrik Schick-i idaktsüba sülen Czech team-i Frank de Boer-i aniba team tsükdakja liasü. Kasa mapang nung Netherlands atema tetsükdaktsü tulu adoka asaya tanabuba shilem tenzüker minute 55buba nung defender Matthijs de Ligt nem red card agüja liasü.

Georginio Wijnaldum-i aniba team-i asayamung kanga junga tenzüker aser asaya ka nung danga tamakok manguba den asaya asem nung parnoki goal ti idaktsü. Ajisüaka Czech den asaya nung parnoki goal nung khen danga ball memetsüoktet, koba UEFA European Championship aser FIFA World Cup puti otsü nung mezüngbuba asütsü.

Czech Republic team taruba asaya Denmark den Baku nung asayatsü aser parnoki iba asaya kokra England mesera Germany den asayatsü.

Kasa asayamung nungsa Deobarnü Belgium-i defending champion Portugal tsükdakja quarter-i iogo.

Asaya tenzüker minute 43buba nung Thorgan Hazard-i goal ka idaktsüba ajanga Roberto Martinez-i aniba team-i takok ngua liasü.

Portugal team-i asaya kanga junga tenzüker Diogo Jota-i minute trokbuba nung maongka tajung ka magitet. Iba sülen Ronaldo-i free kick ka ajanga Belgium keeper Thibaut Courtois tendanga liasü aser parnoki maneni Belgium team nongshia asaya.

Ajisüaka asaya mezüngbuba

shilem atemtsü minute asem lia Thomas Meunier-i agütsüba ball ka Thorgan Hazard-i kanga junga idakja parnoki asaya akok.

Portugal team-i asaya atemtsü minute 10 anunga lia goal idaktsütsü asoshi kanga meranga asaydang. Portugal nungi asayar Ruben Dias-i tekolak agi tongloksüba ball ka Courtois-i kanga junga nokdang aser Raphael Guerreiro-i metsüba ball post nung ondaker adok.

Mapang apuloktsür asayaba mapang tatemsa Portugal-i goal idaktsütsü aoshi maongka angu saka Felix-i metsüba ball post nung aidaka ao.

Quarter nung Belgium team July 2 Italy den Munich nung asayatsü, shirnoki Austria 2-1 agi kokogo.

BILEMDANGANG

**"Tebilemdangba tajung lira
mapa kuma inyakang."**